

12 OCT 1999

Mahathir-DEB

MAHATHIR MINTA PENIAGA CINA BANTU BUMIPUTERA SEKALI LAGI

KLANG, 12 Okt (Bernama) -- Datuk Seri Dr Mahathir Mohamad hari ini meminta masyarakat perniagaan Cina supaya sekali lagi bekerjasama dengan kerajaan untuk membina semula masyarakat perniagaan Bumiputera yang telah terjejas teruk oleh kegawatan ekonomi.

Perdana Menteri berkata semasa kegawatan kebanyakan daripada syarikat Bumiputera termasuk yang besar-besar telah terjejas teruk dan memerlukan bantuan untuk dibina semula dan mengejar kemajuan syarikat lain.

"Akibat kesan kegawatan itu kita kini perlu memikirkan semula mengenai pencapaian Dasar Ekonomi Baru (DEB) setakat ini," kata beliau ketika membuka mesyuarat agung tahunan ke-53 Gabungan Dewan Perniagaan dan Perindustrian Cina Malaysia (ACCCIM) di sini.

Beliau berkata kegawatan itu telah menyebabkan sebilangan besar perniagaan Bumiputera telah dijual kepada bukan Bumiputera, dengan itu mewujudkan semula keadaan tidak seimbang dalam ekuiti ekonomi dan ini mesti dibetulkan.

Dr Mahathir berkata pada masa yang lepas ahli perniagaan Cina telah memberi kerjasama yang baik kepada kerajaan dan mengucapkan terima kasih kepada mereka kerana berkongsi perniagaan mereka dengan Bumiputera.

Katanya tindakan itu telah membolehkan masyarakat Bumiputera belajar mengenai selok-belok perniagaan dan bagaimana hendak menguruskannya.

"Ia telah membantu kejayaan DEB, dan sekarang kita perlu berbuat demikian sekali lagi.

"Saya merayu kepada tuan-tuan sekali lagi supaya membantu dalam usaha mewujudkan keseimbangan dalam kemajuan ekonomi bagi masyarakat lain," katanya dengan mendapat tepukan gemuruh daripada mereka yang hadir, terdiri daripada ketua-ketua pelbagai entiti perniagaan dan industri Cina dari seluruh negara.

Perdana Menteri berkata kerajaan tidak meminta ahli perniagaan Cina melepaskan apa yang sudah menjadi milik mereka.

Apa yang hendak dilakukan ialah membesarkan lagi kekayaan ekonomi negara semula, supaya apabila ia berkembang lebih banyak bahagian dapat diagihkan kepada Bumiputera dan bukan Bumiputera, katanya.

"Saya harap ahli perniagaan bukan Bumiputera akan turut membantu Bumiputera untuk mengimbangi semula kedudukan mereka dengan yang lain supaya pembahagian kekayaan negara sekali lagi dilakukan dengan adil dan wajar," katanya.

Dr Mahathir yakin ahli perniagaan Cina dapat membantu rakan Bumiputera mereka memandangkan mereka mempunyai kemahiran, pengetahuan, latar belakang, tradisi dan budaya selain daripada kemampuan untuk berkembang semula (keluar daripada kegawatan) dan maju dalam perniagaan masing-masing.

Sambil berterima kasih kepada masyarakat perniagaan Cina kerana sumbangan mereka setakat ini, beliau turut melahirkan keyakinan tentang pentingnya sumbangan mereka yang seterusnya kepada pertumbuhan ekonomi negara.

Ketika bercakap pada persidangan berita selepas itu, Perdana Menteri berkata dalam kongres ekonomi Bumiputera baru-baru ini kerajaan mendapat tahu banyak peniaga Bumiputera yang menderita kerana mereka masih baru dalam bidang itu, meminjam dari bank untuk mengembangkan perniagaan dan menanggung hutang.

"Kita bukan sahaja perlu menolong mereka tetapi juga perlu wujudkan (usahawan dan peniaga) yang baru, dengan ini kita minta kerjasamalah

daripada dewan-dewan perniagaan Cina," katanya.

Merujuk kepada DEB, Dr Mahathir berkata usaha membasmi kemiskinan sebagaimana yang terkandung dalam dasar itu tidak menghadapi masalah, tetapi dalam usaha menyusun semula ekonomi antara kaum, usaha itu didapati sudah terjejas disebabkan oleh kegawatan ekonomi negara baru-baru ini.

Ketika menjawab satu soalan, Dr Mahathir berkata kerajaan akan mengkaji memorandum yang sedang disediakan oleh Kongres Ekonomi Bumiputera berhubung DEB sebelum membuat sebarang keketetapan selanjutnya mengenai dasar itu.

Katanya beliau yakin peniaga-peniaga Cina juga akan mengadakan perjumpaan mereka, mungkin tahun hadapan, untuk memberikan pandangan mereka berhubung DEB.

Kerajaan akan menggabungkan semua pandangan itu sebelum membuat apa-apa ketetapan, kata beliau.

-- BERNAMA

AZH NMO